

LIGJ
Nr. 89/2017

PËR DISA SHTESA DHE NDRYSHIME NË LIGJIN NR. 7895, DATË 27.1.1995, “KODI PENAL I REPUBLIKËS SË SHQIPËRISË”, TË NDRYSHUAR

Në mbështetje të neneve 81, pika 2, shkronja ”d”, 83, pika 1, dhe 84, pika 4, të Kushtetutës, me propozimin e një grupi deputetësh,

KUVENDI
I REPUBLIKËS SË SHQIPËRISË

VENDOSI:

Në ligjin nr. 7895, datë 27.1.1995, “Kodi Penal i Republikës së Shqipërisë”, të ndryshuar, bëhen këto shtesa dhe ndryshime:

Neni 1

Në nenin 325, fjalët “me burgim nga tre muaj gjer në tre vjet” zëvendësohen me fjalët “me burgim nga një vit deri në pesë vjet.”.

Neni 2

Neni 327 ndryshohet si më poshtë:

“Neni 327

Shkelja e fshehtësisë së votimit

Shkelja e rregullave që garantojnë fshehtësinë e votimit nga ana e zgjedhësit, nëpërmjet fotografimit të fletës së votimit, ose filmimit të saj, ose dokumentimit me çdo mjet dhe formë të mënyrës sesi ka votuar, shfaqjes së tyre tek persona të tjerë, përbën veprë penale dhe dënohet me burgim nga tre muaj deri në tre vjet.

Shkelja e rregullave që garantojnë fshehtësinë e votimit nga ana e personave të ngarkuar me zgjedhjet, përbën veprë penale dhe dënohet me burgim nga gjashtë muaj deri në tre vjet.

Nxitja me ose pa shpërblim, ose detyrimi i zgjedhësit për të shkelur rregullat që garantojnë fshehtësinë e votimit, sipas paragrafit të parë të këtij neni, përbën veprë penale dhe dënohet nga një vit deri në katër vjet me burgim.”.

Neni 3

Në nenin 327/a, paragrafi i tretë, fjalët “përbën kundërvajtje penale dhe dënohet me burgim nga tre muaj gjer në një vit”, zëvendësohen me fjalët “përbën veprë penale dhe dënohet me burgim nga gjashtë muaj deri në tre vjet”.

Neni 4

Neni 328 ndryshohet si më poshtë:

“Neni 328

Korrupsioni aktiv në zgjedhje

Ofrimi ose dhënia e të hollave, të mirave materiale, premtimi për vend pune ose favorizime të tjera në cilëndo formë në kundërshtim me ligjin, për zgjedhësin ose persona të tjerë të lidhur me të, me qëllim marrjen e firmës për paraqitjen e një kandidati në zgjedhje, për të votuar në një mënyrë të

caktuar, për të marrë pjesë ose jo në votime, ose për t'u angazhuar në veprimtari të paligjshme për mbështetjen e një kandidati ose partie politike, përbën vepër penale dhe dënohet me burgim nga një vit deri në pesë vjet.”.

Neni 5

Neni 328/a ndryshohet si më poshtë:

“Neni 328/a

Përdorimi i funksionit publik për veprimtari politike ose zgjedhore

Pjesëmarrja e një punonjësi që kryen një detyrë shtetërore në shërbimin civil ose në një funksion jopolitik në administratën shtetërore, në kundërshtim me ligjin, në aktivitetet ose fushatën zgjedhore, të një partie politike ose kandidati në zgjedhje, përbën vepër penale dhe dënohet me burgim nga gjashtë muaj deri në tre vjet.

Detyrimi ose organizimi për të marrë pjesë në veprimtari zgjedhore të një subjekti zgjedhor i nxënësve të arsimit parauniversitar nga punonjës që kryejnë një detyrë shtetërore në arsimin publik, ose detyrë a funksion në arsimin jopublik, përbën vepër penale dhe dënohet me burgim nga gjashtë muaj deri në tre vjet.

Detyrimi ose kërkesa drejtuar shtetasve, nga një punonjës që kryen një detyrë shtetërore, që kundër vullnetit të tyre ose nën kërcënimin e përdorimit të masave administrative ose disiplinore, për të marrë pjesë në veprimtari zgjedhore të një subjekti zgjedhor, për të marrë ose jo pjesë në zgjedhje, për të mbështetur ose jo një parti politike ose një kandidat në zgjedhje, ose për të votuar në një mënyrë caktuar, përbën vepër penale dhe dënohet me burgim nga një vit deri në tre vjet.

Përdorimi nga një punonjës që kryen një detyrë shtetërore, i të mirave publike, funksionit ose veprimtarisë shtetërore, ose i burimeve financiare ose njerëzore, me qëllim favorizimin e një partie politike ose kandidati në zgjedhje, në kundërshtim me ligjin dhe qëllimin e detyrës, përbën vepër penale dhe dënohet me burgim nga një vit deri në tre vjet.”.

Neni 6

Pas nenit 328/a shtohet nenit 328/b me këtë përmbajtje:

“Neni 328/b

Korrupsioni pasiv në zgjedhje

Kërkimi ose pranimi nga zgjedhësi i të hollave, të mirave materiale, ose favorizimeve të tjera në cilëndo formë në kundërshtim me ligjin, për vete ose të tjerët, me qëllim për të dhënë firmën për paraqitjen e një kandidati në zgjedhje, për të votuar në një mënyrë të caktuar, për të marrë pjesë ose jo në votime, ose për t'u angazhuar në veprimtari të paligjshme në mbështetjen e një kandidati ose partie politike, përbën vepër penale dhe dënohet me burgim nga një vit deri në pesë vjet.”.

Neni 7

Në nenin 329 bëhen ndryshimet si më poshtë:

a) në paragrafin e parë, fjalët “përbën kundërvajtje penale dhe dënohet nga tre muaj gjer në dy vjet” zëvendësohen me fjalët “përbën vepër penale dhe dënohet me burgim nga gjashtë muaj deri në tre vjet”;

b) në paragrafin e dytë, fjalët “nga gjashtë muaj gjer në tre vjet” zëvendësohen me fjalët “nga një vit deri në katër vjet”;

c) në paragrafin e tretë, fjalët “nga një vit gjer më pesë vjet” zëvendësohen me fjalët “nga dy deri në pesë vjet”.

Neni 8

Në nenin 330 bëhen ndryshimet si më poshtë:

- a) në paragrafin e parë, fjalët “nga gjashtë muaj gjer në një vit” zëvendësohen me fjalët “nga një vit deri në pesë vjet”;
- b) në paragrafin e dytë, fjalët “nga një gjer në pesë vjet” zëvendësohen me fjalët “nga tre deri në shtatë vjet”.

Neni 9

Në nenin 330/a bëhen ndryshimet si më poshtë:

- a) në paragrafin e parë, fjalët “përbën kundërvajtje penale dhe dënohet me burgim nga gjashtë muaj gjer në dy vjet” zëvendësohen me fjalët “përbën vepër penale dhe dënohet me burgim nga gjashtë muaj deri në tre vjet”;
- b) në paragrafin e dytë, fjalët “gjer në pesë vjet” zëvendësohen me fjalët “deri në shtatë vjet”.

Neni 10

Në nenin 332 fjalët “përbën kundërvajtje penale dhe dënohet me gjobë ose me burgim gjer në dy vjet” zëvendësohen me fjalët “përbën vepër penale dhe dënohet me burgim nga gjashtë muaj deri në tre vjet”.

Neni 11

Pas nenit 331 shtohet neni 331/a me këtë përmbajtje:

“Neni 331/a

Marrja ose përdormi i paligjshëm i dokumenteve të identifikimit

Dhënia e dokumentit të identifikimit me qëllim përdorimin e tij në mënyrë të paligjshme për zgjedhje, garantimin e mospjesëmarrjes në votime, për të ndikuar në mënyrën e votimit, ose për çdo qëllim tjetër të paligjshëm që lidhet me zgjedhjet, përbën vepër penale dhe dënohet me burgim nga një vit deri në tre vjet.

Marrja e dokumentit të identifikimit të shtetasve të tjerë, me qëllim përdorimin e tij në mënyrë të paligjshme për zgjedhje, moslejimin për të votuar, për të ndikuar në mënyrën e votimit, ose për çdo qëllim tjetër të paligjshëm që lidhet me zgjedhjet, përbën vepër penale dhe dënohet me burgim nga një deri në pesë vjet.”.

Neni 12

Pas nenit 332 shtohet neni 332/a me këtë përmbajtje:

“Neni 332/a

Shpërdorimi i autoritetit policor

Shpërdorimi i autoritetit policor nga punonjësi i Policisë së Shtetit ose i Policisë së Burgjeve për të influencuar në mbështetjen e një partie politike ose kandidati në zgjedhje, nëpërmjet mosushtrimit të funksionit me paanësi sipas ligjit, pjesëmarrjes në veprimtari politike të një partie politike ose kandidati në zgjedhje, me kryerjen e çdo veprimi ose dhënien e urdhrave, këshillave apo çdo lloji tjetër propagande që favorizon një parti politike ose kandidat në zgjedhje, përbën vepër penale dhe dënohet me burgim nga një vit deri në pesë vjet.”.

Neni 13
Hyrja në fuqi

Ky ligj hyn në fuqi menjëherë dhe botohet në Fletoren Zyrtare.

KRYETARI
Ilir Meta

Miratuar në datën 22.5.2017